

Йоскалык библиотекалэн шыкысаз

ПЕДАГОГИКА

Кузнецова Р.А. Удмуртские, русские, татарские загадки: обучение в диалоге культур. – Ижевск: АОУ ДПО УР ИРО, 2020. – 151 с.

Учебно-методической пособилэн нырысетй люкетаз дышетонын мадисконъёсты кутон амальёс усътэмын, нош кыкетй люкетаз пöртэм пуштрöсьем удмурт, зуч, бигер мадисконъёс сётэмын. Издание чакламын дышетйсьёслы но визьнодасъёслы, педколледжын но выль дышетскон юртын «Дошкольное образование» профиля дышетскись студентъёслы.

Дудник Л.А. Остров счастливой жизни: сказки-беседы для взрослых с детьми: [практика педагога-психолога]. – Ижевск: Удмуртский издательский дом, 2021. – 47 с.

Книгаын выжыкылъёсын зечлык но уродьяськон, дйсьтонлык но кышкась луон, эшъяськон но тушмоньяськон, ляб сямъёсыз вормон сярсь вераське. Котькуд выжыкыл бере юанъёсы ке-нешыны дэмламын. Книга чакламын 6 арсьем но солъсь бадзым нылпиослы, анай-атайёслы но педагогъёслы.

Удмурт кыллэн дунневыл нуналыз: методика дэмланъёс / дасяз А.А. Клементьев. – Ижевск: АОУ ДПО УР ИРО, 2020. – 55 с.

Удмурт кыллэсь данзэ мерлыкын будэтон вылысь 2018-тй арысен 27-тй шуркынмонэ Удмурт кыллэн дунневыл нуналыз пусйиське. Методика дэмланъёс дасямын Удмурт кыллэсь дунневыл нуналзэ пуштрöсэз но кабез ласянь радьян но ортчтон вылысь. Юрттэт пöрмемын азыкыллэсь но кык люкетъёслэсь: дэмланъёслэсь, ужрадъёслы разработкаослэсь но ватсэтлэсь. Чектонъёс пайдаё луозы дышетон но лулчеберет удысын ужасьёслы. Ужез дасяз Андрей Александрович Клементьев – кылобур тодосъёсы кандидат, «Вордскем кыл» журналлэн валтйсь редакторез.

ШАЕРТОДОН

Мултанское дело: истоки, уроки, исторические последствия: к 125-летию окончания

Мултанского процесса (1892–1896 гг.). – Ижевск: п. Кизнер; с. Короленко: Шелест, 2021. – 79 с.

Бичетэ пыризы Мултан ужлы 125 ар тырмонлы сйзем тодослыко конференциын лыдзем ужъёс (2021-тй ар 27–28 гудырикошкон). Статьясын саклык висъямын Кизнер ёрослэн историзлы, В.Г. Короленколэн творчествозлы но «Эхо Мултанского дела» экскурсионной маршрутлы. Со 25 ар радьяське ини Короленко черкогуртысь «Вуж Мултан» музейын.

Предметные реалии удмуртской этнокультуры / авторский коллектив: Т.Г. Владыкина, Н.В. Анисимов, А.А. Арзамазов [и др. – Ижевск: УдмФИЦ УрО РАН, 2021. – 187 с.

Монографиын куинь аспектыя арбериос эскеремын: кылын, удмурт обрядъёсын (фольклорын, калык эмтодосын) но удмурт кылбуретын кутйськемзыя.

Миннихметова Т.Г. В поисках удмуртских жемчужин по эстонским архивам. – Тарту: ЭЛМ, 2020. – 216 с.

Справочной изданиын люкамын удмуртъёслэсь фольклорзэс, этнографизэс, историзэс эскеронлы сйзем Эстониын утиськись материалъёс. Кылярысь, ужьюртъёс пöлын Эстон йоскалык музей, Эстон литературной музей, Эстон кыллэн институтзэ, Устолькъя эстон академия, Крезьгурья но театрья эстон академия но мукет.

Современная удмуртская культура: [сборник статей: в 2-х томах] / Таллинский университет; составители Ева Тулуз [и др.]. Т. 2. – Таллинн: Издательство Таллиннского университета. – 2021. – 488 с.

Книгаез дасязы Ева Тулуз, Елена Попова, Николай Анисимов. Авторъёс пöлын Вера Пантелеева, Любовь Фёдорова, Светлана Арекеева, Лариса Дмитриева, Мария Векшина, Ирина Пчеловодова, Богдан Анфиногенов, Галина Глухова, Юрий Перевозчиков, Елена Попова но мукет тодосчиос. Статьясын эскеремын туалал удмурт крезьгур, оскон, лулчеберет, литература но мукет öръёс.

Атаманов М.Г. Интервью. Вы спрашиваете – я отвечаю / Атаманов-Этрапи Микаль. – Ижевск: Шелест, 2021. – 431 с.

Книгае пыризы Михаил Атамановен интервьюос. Соин кенешо Татьяна Зайцева, Любовь Тихонова, Галина Романова, Алексей Арзамазов, Лариса Орехова, Татьяна Душенкова но мукет тодмо журналистъёс но тодосчиос.

Волкова Л.А. «Примите уверение в искренней преданности...»: эпистолярное наследие Николая Григорьевича Первухина. – Ижевск: АлкиД; – Глазов, 2021. – 203 с.

История тодосъёсыя кандидатлэн Люция Апполосовна Волковалэн книгаез пыризы удмурт калыклэсь этнографизэ эскерисьлэн, Глаз уездысь калык училищеослэн инспекторзылэн Н.Г. Первухинлэн гожтэтъёсыз, со сяна отчётъёс, докладъёс – ваньмыз 90 документъёс. Соос инспекторлэсь 1885–1889-тй аръёсы Глаз уездын ужан вакытэз возьмато.

Первомайский. Страницы истории / составители М.Ф. Сметанина, Т.С. Овсянникова. – Ижевск: Удмуртия, 2021. – 159 с.

Книгаын Дэри ёросысь азьвыл Первомайский посёлоклэн историз, отын улэм но улйсь калык сярсь гожтэмын.

КЫЛТОДОС

Кельмаков В.К. «Песни и сказы твои останутся...» = «Кырзам-верамед кылэз...». Удмуртские фольклорные тексты, изданные Б. Гавриловым = Б. Гавриловлэн поттэм удмурт калыккылос куэтъёсыз / редакторы: Н.В. Кондратьева [и др.]. – Ижевск: Удмуртский университет, 2020. – 570 с.

Валентин Кельмаковлэн тодослыко изданияз графо-орфография но кыл ласянь воштонъёстэк пыризы Борис Гавриловлэн 1880-тй арын потэм «Произведения народной словесности, обряды и поверья вотяковъ Казанской и Вятской губерний» книгаысьтыз фольклор текстъёс (200 кырзан, 172 мадискон, 14 выжыкыл, 5 вöсьяскон кылъёс, 5 легенда но веросъёс) но мукет). Эскеремын Б. Гавриловен гожтэм фольклор текстъёслэн диалектёссы, диалект ласянь аспöртэмлыкъёссы. Приложениын текстологической комментариос пыр эскеремын «Произведения народной словесности, обряды и поверья вотяковъ Казанской

и Вятской губерний» бичетъёс фольклор текстъёслэн М. Бухлэн, Б. Мункачилэн, Г. Лыткинлэн, Н. Кралиналэн, Т. Перевозчиковалэн, Л. Ганьковалэн книгаосазы кутйськемзы.

ЛИТЕРАТУРАТОДОС

Фёдорова Л.П. Художественный текст: путь к читателю = Чеберлыко гожтослэн лыдзись доры сюресэз. – Ижевск: Удмуртский университет, 2020. – 229 с.

Дышетон пособиын усътэмын Ашальчи Окилэн, Трофим Архиповлэн, Геннадий Красильниковлэн, Роман Валишинлэн, Людмила Кутяновалэн произведениоссэс гожтон историссы. Кыкетй люкетаз эскеремын писательёслэн творческой лабораторизы. Туж тунсыко тодматскыны авторъёслэн кижотосъёсынызы.

Пантелеева В.Г. Интыгысь дыр = Местное время. – М.: А.М. Горький нимо литературной институт, 2021. – 319 с.

Та книгаын авторез Вера Григорьевна Пантелеева – литературовед но критик, кылобур тодосья кандидат, доцент, Москваысь А.М. Горький нимо литературной институтысь чеберлыко литератураез берыктонъя семинарен кивалтйсь. Солэн книгаез луиз нырысетйез, кудйз потйз Литературной институтлэн «Йоскалык литератураослэн юртсылэн библиотекаез» серияз. Бичетэ люкамын удмурт но зуч кылын удмурт литература сярсь статьяос, дунъетъёс, ваче вераськонъёс.

Учёный. Поэт. Публицист: к 85-летию со дня рождения и 60-летию творческой деятельности В.М. Ванюшева / [Арзамазов А.А., Атнабаева Н.А., Агафонова Ф.М. и др.]. – Ижевск: УдмФИЦ УрО РАН, 2021. – 291 с.

Коллективной монографилэн 500 пала авторъёсыз. Татчы пыризы литературоведлы, кылобур тодосъёсыя докторлы, Удмуртиысь калык кылбурчылы Василий Ванюшевлы сйзем статьяос. Ужъёсын усътйсько солэн пöртэм öръёсыя ужамез, удмурт литературалэсь историзэ эскеронын но тодослыко ужрадъёсты радьянын интыез.

Светлана Аркадьевна ВОРДАКОВА,
Удмурт Элькунысь Йоскалык лыдзиськонниысь
«Книжной палата» ёзтын ужась